

P. Vimalasekaran

# **Jezus: Unë isha refugjat**

Përktheu: Florenc MENE



# **Perëndia i qiellit hyri në një botë të huaj!**

Rreth dy mijë vjet më parë, siç kishin parathënë profetët, Jezusi lindi në Izrael, në një qytezë të quajtur Bethlehem.

Ndonëse lindi në një familje modeste, lindja e Jezusit ishte vërtet e mbinatyrshme dhe, pa dyshim, ishte mrekulli e madhe! Lindja e Jezusit nuk ishte pjellë e imagjinatës, as histori e trilluar, pasi ekzistojnë më tepër prova historike për jetën tokësore të Jezusit sesa për çdo personalitet tjetër të famshëm në lashtësi.

I lindur nga një virgjëreshë, pa asnjë ndërhyrje njerëzore, Perëndia u mishërua me anë të fuqisë së Frymës së Shenjtë (Mat. 1:22-23).

Merre me mend! Perëndia, që krijoi këtë univers, u bë pjesë e tij duke marrë mbi vete natyrën njerëzore dhe hyri si njeri në botën që kishte krijuar.

Për mendjen njerëzore, kjo është e pakonceptueshme, por për Krijuesin e këtij universi, kjo s'ishte diçka e vështirë. Në fund të fundit, Ai që krijoi njeriun nga asgjëja është në gjendje të bëhet dhe vetë njeri. Ai që e modeloi njeriun ishte Perëndia; si i tillë, ai është më se i aftë që të marrë natyrë njerëzore dhe të përjetojë lindjen tokësore.

Ngaqë ishte vetëekzistues, Jezusi nuk pushoi kurrë së qeni Perëndi, edhe kur lindi dhe u rrit si qenie njerëzore. Kështu, meqë Jezusi ishte në të njëjtën kohë vërtet Perëndi dhe vërtet njeri, ai është i vetmi “Perëndi-Njeri”.

Në fakt, hyrja e Perëndisë në këtë botë ishte vërtet diçka e pashoqe. “Perëndia-Njeri” la vendet e tij qiellore dhe hyri në këtë botë të huaj dhe të ndryshme për ty.



## Shpërthen dhuna

Jezusi nuk ishte i paditur për dhunën e tmerrshme që kryen raca njerëzore. Madje, ai kishte qenë viktimë e kësaj dhune që kur ishte foshnjë.

Në kohën e lindjes së tij, mbret i Judesë ishte heroi. Ai ishte famëkeq si njeri i dhunës. Po të dyshonte se dikush donte t'i merrte fronin, e vriste. Madje, Herodi vrau tre nga djemtë e vet dhe një nga gratë e veta, ngaqë i shihte si kërcënim. Në kohët e sotme, do ta quanim një megaloman që adhuron pushtetin.

## **Jezusi nuk ishte i paditur për dhunën e tmerrshme që kryen raca njerëzore.**

Meqë titulli që iu dha Jezusit në lindje ishte Mbreti i judenjve, Herodi e keqkuptoi dhe mendoi se Jezusi do t'i merrte fronin.

Si rrjedhojë, mbreti Herod urdhëroi masakrimin e gjithë fëmijëve nën moshën dyvjeçare në atë kohë në Betlehem dhe në zonat përreth, me shpresën se do të vritej edhe fëmija Jezus dhe, si rrjedhojë, Herodi do ta hiqte qafe këtë rival.

Kështu, filloi një vrasje në masë me qëllim që dikush të ruante pushtetin, njësoj si historitë që dëgjojmë dhe sot. Një diktator vendos të vrasë ata që mendon se i kundërvihen, ose që janë rivalë të tij.



Për pak, të duket sikur dëgjon nënat që vajtojnë dhe baballarët e shkatërruar, të cilët, për shkak se s'kishin gjë në dorë, e kishin të pamundur të parandalonin këtë tragjedi të çmendur dhe po shihnin me sytë e tyre sesi foshnjat e tyre, duke klithur, po thereshin nga një i çmendur që dashuronte vetveten.

E përfytyron dot të dëgjosh dhimbjen e atyre prindërve dhe të mendosh se, sikur të arratiseshin prej mizorive të Herodit për të mbrojtur fëmijët e tyre, ata do ta bënë këtë gjë, sado e vështirë të ishte? Çdo prind e do fëmijën e vet dhe nuk dëshiron që ai të përballet me rreziqe.



Si Herodi, ka ende mijëra burra që ushtrojnë dhunë si mjet për të përmbushur synimet e tyre egoiste në dëm të të tjerëve.

Si rezultat, edhe në kohën tonë, shohim sesi mijëra njerëz arratisen prej këtyre burrave të dhunshëm. Shohim miliona njerëz që janë shtypur dhe përndjekur në mënyrë të dhunshme nga dikush që dëshiron të bëhet njeri i fuqishëm.



# Në arrati, si refugjat

Megjithatë, Herodi nuk mund t'ia hidhte Perëndisë dhe të shkatërronte fëmijën Jezus, ndonëse ai ishte ende foshnjë, më i vogël se dy vjeç.

Përpara se ushtarët e Herodit të shkonin te familja e Jezusit, me anë të një ëndrre Perëndia paralajmëroi prindërit tokësorë të Jezusit që të arratiseshin në Egjipt. Egjipti ishte jashtë juridiksionit të Herodit, ndaj ai s'kishte pushtet për të ushtruar autoritetin e vet atje. Kështu nisi rrugëtimi i një Refugjati madhështor në historinë e kësaj bote, si dhe rënia e perdes së errësirës në tokë.

Kështu, me qëllim që t'u shpëtonte vrasësve të vet, Jezusi, Perëndia-Njeri, nisi udhëtimin për në Egjipt në kërkim të një strehimi nga përndjekja politike e armikut të vet. Vetë Perëndia, i cili është Strehë në këtë botë, u desh të gjente strehë për vete!



Si mund ta parandalonte këtë tragjedi ndaj vetes Perëndia i plotfuqishëm? Kjo do të ishte pyetja jonë për Perëndinë. Është interesante ta përfytyrojmë nga ana jonë, por prit derisa të kuptosh më mirë se përse e kaloi Jezusi këtë vështirësi.

Jezusi, Perëndia-Njeri, mori me dëshirë formë njerëzore me qëllim që të identifikohet me racën njerëzore. Kështu, askush s' do të mund të thoshte se Perëndia nuk të kupton ty, ose mua.

Nuk ka më shfajësim për ne. Jezusi, Perëndia-Njeri, u ndie ashtu siç ndihet refugjati. Jezusit iu desh të merrte arratinë, ashtu siç i ndodh çdo refugjati. Sa njerëz identifikohen me këtë sot? Nga mënyra sesi janë arratisur nga armiqtë e tyre? Kanë paguar para për t'u arratisur prej armiqve të tyre, larg të dashurve dhe familjeve të veta.

Arrin ta kuptosh tani pse ZOTI Jezus e përjetoi këtë ngjarje në jetën e vet? Sigurisht, mund të themi, po. Jezusi e di sa e vështirë është të jesh ikanak dhe të arratisesh në një vend tjetër. Jezusi i kupton dhimbjet, frikën dhe ankthet që përjeton si refugjat çdo njeri. Ai ndien keqardhje për ata që trajtohen në mënyrë të padrejtë, dhunohen në mënyrë të tmerrshme, torturohen dhe detyrohen të thonë me vete: “pse të jetoj më në këtë botë?”

## **Jezusi e di sa e vështirë është të jesh ikanak dhe të arratisesh në një vend tjetër.**

Edhe Jezusi ishte i huaj në tokë. Si Qenie Qiellore, ai la Shtëpinë e vet dhe erdhi në tokë. Është vërtet gjë e çuditshme që Perëndia i qiejve hyri në botë si njeri. Jezusi e bëri këtë ngaqë e do popullin e vet. Ai kujdeset për ta. Ndonëse ishte në formë Perëndie, Jezusi “nuk e konsideroi si një gjë kur të mbahej fort për të qenë i barabartë me Perëndinë” (Fil. 2:6-7).

Me fjalë të tjera, Jezusi u bë me dëshirë i huaj në tokë, “sepse unë e jap vetë jetën time dhe e marr përsëri. Askush s’ma merr dot, por e lë me dëshirën time” (Gjoni 10:17-18).

Ai s’kishte nevojë të bëhej njeri në tokë, apo refugjat në këtë botë. Jezusi zgjodhi të bëhej refugjat për popullin e vet, të cilët i do me gjithë shpirt.



## Ç'vlerë ka kjo për mua?

Tani, ti mund të thuash: e çfarë se Jezusi ishte refugjat?

Nëse Jezusi ishte refugjat, njësoj si ti, ai të kupton; t'i kupton nevojat dhe përmallimet e brendshme. S'mund të thuash më “e çfarë pastaj?”, por, “sa e mrekullueshme është të di se Perëndia-Njeri, Jezusi, ishte njësoj si unë. Fjala e Perëndisë na thotë: “Sepse ne nuk kemi një Kryepriфт që nuk ndien keqardhje për dobësitë tona, por që, në të gjitha gjërat, u tundua njësoj si ne, por pa mëkat. Prandaj, le t'i afrohem me guxim fronit të hirit, që të marrim mëshirë dhe të gjejmë hir dhe ndihmë në kohë nevojë” (Heb. 4:15-16).



Kështu, Jezusi të kupton ty si refugjat në çdo aspekt. Ai e di sa e vështirë është të jesh në një vend të huaj, mes njerëzish të huaj me një gjuhë komplet ndryshe. Jezusi dhe prindërit e tij tokësorë, Jozefin dhe Marinë, u detyruan të përballonin një mënyrë të re jetese në Egjipt. Ndoshta, ata nuk u mirëpritën, ose u izoluan nga populli i atij vendi. Duhet të ketë qenë e vështirë për ta që të pranoheshin ose kuptoheshin.

Pa dyshim, këtë gjë e shohim dhe në kohën tonë. Shumë refugjatë shihen si njerëz të padëshiruar. Ata nuk mirëpritën, ose askush s'dëshiron të dëgjojë historinë e tyre dhe t'ua kuptojë hallin. Mos u habitni nga kjo, pasi edhe vetë Zoti Jezu Krisht, i cili krijoi botën dhe i dha jetë racës njerëzore, u detyrua të përballlej vetë me këto lloj problemesh.

**Jezusi nuk qëndron i veçuar prej teje duke pritur që t'i kalosh të gjitha vështirësitë e vetëm. Ai do t'ia dijë për ty si person, çfarëdo prejardhjeje, feje, fisi, apo kombësie, t'i përkasësh.**

Po tani, a po fillon të shohësh se ç'Perëndi i mrekullueshëm është Jezusi? Jezusi nuk qëndron i veçuar prej teje duke pritur që t'i kalosh të gjitha vështirësitë e vetëm.

Ne mund të themi se Jezusi, Perëndia-Njeri, t'i kupton gjuhën dhe dëshirat për të të treguar se ai do t'ia dijë për ty si person, çfarëdo prejardhjeje, feje, fisi, apo kombësie, t'i përkasësh. Si Krijues i këtij universi (Gjoni 1:1-3), Jezusi mban gjithçka në duart e tij, përkujdeset për ty dhe dëshiron që të shkosh tek ai dhe të mësosh për të.



## Streha për refugjatin

Ja dhe një mendim tjetër që duhet të ngushëllojë shpirtin e gjithkujt. Fjala e Perëndisë thotë se Perëndia është Strehë për refugjatin. “Zoti do të jetë edhe një strehë për të shtypurit, një Strehë në kohë vështirësie” (Psalmi 9:9).

Fjala “strehë” do të thotë një vend ku njeriu mund të gjejë mbrojtje, ushqime dhe siguri nga të gjitha rreziqet e tanishme, të ardhshme, apo të paparashikuara. Jezusi të kupton ty si refugjat më mirë se çdo njeri tjetër në gjithë këtë botë, dhe ai ka për të qenë Streha jote.



**Jezusi të kupton ty si refugjat më mirë se çdo njeri tjetër në gjithë këtë botë, dhe ai ka për të qenë Streha jote.**

Jezusi e di se ti ke nevojë për një vend ku mund të jesh i sigurt, i ngushëlluar dhe nën përkujdesjen e të tjerëve. Po ta pyesësh veten me ndershmëri, do të të pëlqente të gjeje një strehë të tillë, apo jo?

Zoti i këtij universi interesohet për gjithë ata që janë të shtypur dhe të përndjekur. Ti nuk je harruar në planin e Perëndisë. Madje, në fakt, Perëndia ka një plan të veçantë për jetën tënde.

Si mund ta gjesh vetë këtë plan? Duhet ta vendosësh besimin vetëm tek ai dhe të besosh te Fjala e Perëndisë si zbulesa e tij. Fjala e Perëndisë është plani i përsosur për çdo qenie njerëzore.

“Besoni tek ai në çdo kohë, o popull; zbrazeni zemrën përpara tij; Perëndia është strehë për ne” (Psalmi 62:8). Eja te kjo Strehë, te Krishti Jezus, dhe gjej siguri për shpirtin tënd dhe kuptim për ekzistencën tënde në këtë botë. Jezusi të fton: **“Ejani tek unë, gjithë ju që jeni të munduar dhe të rënduar, dhe unë do t’ju çlodh”** (Mat. 11:28).

Kjo është një ftesë nga Mbreti i Mbretërve dhe Zoti i Zotërve. Po të vish, do të gjesh prehje në Jezusin. Prehja është e garantuar nëse vjen te Jezusi.

Zoti Jezu Krisht dha jetën e vet për të ta sjellë këtë prehje. “Të gjithë ne kemi mëkatuar dhe kemi rënë nga lavdia e Perëndisë” (Rom. 3:23). Me fjalë të tjera, gjithë raca njerëzore ka shkelur ligjet e Perëndisë dhe, në këtë mënyrë, kemi kryer mëkat kundër Krishtit tonë.



Duhet të përulesh dhe të pranosh se je mëkatar përpara Perëndisë së shenjtë. Mëkati është arsyeja pse jemi ndarë nga Perëndia. Megjithatë, Perëndia i Dashur çeli një rrugë për të shkuar prapë tek ai përmes Jezu Krishtit.

Kjo kërkonte që Krishti të vuante nga duart njerëzore, të pësonte një vdekje tejet mizore në kryq dhe të ringjallej sërish ditën e tretë. Në kryqin e Krishtit, Perëndia na demonstroi rrugën e kthimit te jeta e përjetshme. “Kaq shumë e deshi botën Perëndia sa dha Birin e vet të vetëmlindur që kus-hdo që beson në të të mos humbasë, por të ketë jetë të përjetshme” (Gjoni 3:16).

Ekziston vetëm një Udhë drejt kësaj prehjeje, pra, Krishti Jezus: “Unë jam Udhë, e Vërteta dhe Jeta” (Gjoni 14:6).

Pse nuk vjen te Jezusi?

Çfarë të pengon te vish te Jezusi? Mos, ndoshta, prejardhja, kultura, feja jote, apo arsye të tjera?

Mos lër asgjë të të mbajë larg kësaj Strehë të Mrekullueshme. Ai të do pa të paragjykuar aspak asnjë rrethanë.

Jezusi do t’ia dijë për ty si individ, dhe në mënyrë personale.

Eja dhe shiko se në Jezusin ekziston një bollëk jete dhe gëzimi.

Me të vërtetë, Jezusi është Strehë për refugjatin.

Nëse dëshiron të kesh paqe me Jezusin dhe ta kesh  
Strehë, thuaj këtë lutje:

*Atë i dashur në Qiell,  
kam nevojë për ty në jetën time.*

*Të falënderoj për Zotin Jezu Krisht  
dhe për atë që ai bëri për mua në kryq.*

*Përulem përpara teje  
dhe të rrëfej mëkatet e mia.  
Merr jetën time dhe jepi formë.*

*I dashur Zot Jezus, eja në jetën time,  
më fal mëkatet  
dhe ji Streha ime.*

*Amen.*



**Sepse Perëndia e deshi kaq shumë botën  
saqë dha Birin e tij të vetëm,  
që askush që beson në të  
të mos humbasë, por të ketë jetën e përjetshme.**

*Gjoni 3:16*

**Ju përpiqeni të prishni planet e të  
varfrit, por Zoti është streha e tyre.**

*Psalmi 14:6*

**Perëndia është streha dhe forca jonë,  
një ndihmë gjithmonë e pranishme në vështirësi.**

*Psalmi 46:1*

© Copyright – Dr. P. Vimalasekaran  
European Christian Mission

Photos: David Niblack, Imagebase.net, except of: cover (L. Baumann), p. 18 (B. Baumann).

Published By:

European Christian Mission  
[www.ecmi.org](http://www.ecmi.org)

Refugee Ministry International  
807 Monroe St., Suite A  
Clinton, MS 39056  
USA  
[email.connect.rmi@gmail.com](mailto:email.connect.rmi@gmail.com)